

Kibaaroolu, mennu danteeta Epirel, Mee niŋ Juuni karoo kono sanji 2005

Kibaari kutoolu be santo

Momodu "Justice" Daabo, 21.06.2005

Kambiya be fariŋi dadaadulaa soto la

Kambiya ŋaatonkoo Yaayaa Jamme, a ye diyaamoo soto, a niŋ julabaa saba, mennu bota Amerika bankoo kaŋ. Niŋ julabaalu la hamenna kuwo mu ka fariŋi dadaadulaa londi Kambiya bankoo kaŋ.

Steven Briskey, julabaalu la ŋaatonkoo ye niŋ tandi ko, i niŋ Kambiya ŋaatonkoo la kacia loota ka siloolu juubee, i be fariŋi dadaadulaa loo la Kambiya bankoo kaŋ ŋaameŋ. A ko, Kambiya bankoo la ŋaatonkoo ye a la kontaanoo tandi niŋ julabaalu la lafoo ka safaaroo ke Kambiya bankoo kaŋ. A ko, Jamme mu moo le ti, meŋ lafiita safaaroo la aniŋ Kambiya bankoo la ŋaatotaa. A ko, joraŋolu mennu be ke la niŋ fariŋi dookuudulaa be bo la *Argentina, Brazil* aniŋ *USA*, Amerika bankoolu kaŋ.

Momodu "Justice" Daabo, 21.06.2005

Alimaamoo ye duwaa ke ka samaa soto

Kambiya bankoo la alimaame ŋaatonka baa, Corino Kaa, a ye Alla daani puru a si Kambiya maakoyi tumoo meŋ na samaa fele, a be kumaasi la. A la kutuboo to Arijuma luŋo, alimaamoo Kaa ye Kambiyankoolu be daani puru i si duwaa ka daani Alla Tallaa bulu, i si a je a si bankoo maakoyi samaa la kumaasi waatoo.

"Niŋ duwaa kummaayaata baake le, baawo ñ na baluwo ka bo samaa le to aduŋ senelaalu ye i la kunkoolu parendi le samaa kamma la. Wo to m be imaamoolu daani la puru i si duwaalu ke i la misiroolu kono puru samaa si soto," Kaa ye niŋ fo ko, fiifeŋolu la beteyaabaliyaa ŋinaŋ na, wo ye koleyaa kuu baa le saabu moolu ye.

Momodu "Justice" Daabo, 17.06.2005

NADD jombota

Oposisonoolu la paatiyolu, menne be Kambiya bankoo kaŋ, a maŋ mee baake, i ye politiki kafu baa jombo, meŋ be a saabu la, i si soo ñoo kaŋ puru ka Yaayaa Jamme la mansakundaa boyindi peresidaŋ kariteefayoo, meŋ be naa kaŋ.

Kafoo niŋ, meŋ i ka a kili ko *NADD (National Alliance for Democracy and Development)*, ye politiki kafoolu, mennu be ko UDP, NRP, PDOIS, NDAM aniŋ GPP le sonde ñoo kaŋ aduŋ jomboroo keta *Buffer Zone*, Talindiŋ, daameŋ moo wuli jamaa benta jee.

NADD la siirantiyo Asani Musa Kamara be diyaamoo la tumoo meŋ na, a ye ñiŋ tandi de, NADD funtita le puru ka juubeeri ke siloolu la, meŋ be a saabu la ka Jamme bondi semboo to kariteefayi naalaa. A ye ñiŋ fo ko, NADD naata ka Kambiyankoolu tankandi mararali jawoo le ma.

A be diyaamu la tumoo meŋ na, Halifa Salla, NADD la *coordinator*, ye ñiŋ tandi de, NADD naata le puru ka hadamadiŋolu la ñantoo tankandi, ka demokaraasi aniŋ tankoo bambandi Kambiya bankoo kaŋ. A ye ñiŋ fo de, NADD mansakundaa be katakuu baalu le ke la puru ka ñaatotaa aniŋ yiriwaa samba naŋ Kambiya bankoo kaŋ.

UDP ñaatonkoo looyaa Usayinu Daabo, a la diyaamoo, a to waasita Kambiyankoolu ye puru ì si naa ka kafu NADD la. A ye daaniroo ke Kambiyankoolu la, ì si kayiroo sabatindi waati-wo-waati.

Momodu "Justice" Daabo, 17.06.2005

Kendiŋo meŋ ye "juusambalaa" lipa

Kendiŋo doo, Baabukari Kambi, funtita Bunduŋ kiitiibuŋ baa ñaatiŋo la bii, Juunu karoo tili taŋ niŋ naani, kaatu a ye moo "juusambalaa" le lipa fo a ye a barama. Kambi tuumita ko, ate aniŋ moo jamaa Febuwari karoo tili muwaŋ niŋ woaroo, ñiŋ saŋo la, ì ye kee doo ñapinkaŋ ka a lipa fo ì ye a barama jawuke. Ì ye kendiŋo meŋ lipa teŋ, ì ye a tuumi le ko, ate le ye sanji taŋ niŋ naani dindiŋo la keeyaa taa. Bari Kambi naata balaŋ tuumiroolu la, mansakundaa ye meŋ laa a kaŋ. Kiitiyo ñiŋ be kontinee la le.

Momodu "Justice" Daabo, 17.06.2005

Indiya la sanji luulu polisoo

Waatoos meŋ na dindiŋ jamaa ka tara paree kaŋ ka taa karambuŋo to, *Saurabh Nagvans* ka tara ofisi le fokabaŋ. *Saurabh* ka dookuwo ke poliisikundaa le to meŋ be *Raipur*, Indiya bankoo kaŋ. A siyo be sanji luulu. Ate fanaa be moolu le kono, mennu ka ì la moolu jooseyi, mennu faata waatoos meŋ ì be mansakundaa dookuwo la. Sanji taalaa a niŋ dimbaayaa jamaa maŋ feere doo soto bari fo ka dindiŋolu kii dookuwo la puru dimbaayaa si baluu.

Saurabh ka dimbaayaa le maakoyi, meŋ taata fo moo luulu. Wo kamma la, *Ishari Deyi Nagvanshi*, a baamaa ka a buloo muta ka a samba a la dookuudulaa meŋ be *Raipur*. Wo niŋ itolu la saatee teemoo taata le fo kilomeetari keme niŋ kononto.

Momodu "Justice" Daabo, 17.06.2005

Jii kuwo ye Kunjurunkoolu batandi

Kibaaroolu, mennu ka bo Kombo Kunjuru, ñiŋ temboolu ye ñiŋ ne tandi de, moo wuli jamaa mennu be wo saateewo to, jii kuwo naata ke ì ye koleyaa kuu baa le ti ñiŋ temboo la. Kombo Kunjuru le mu saatee baa ti, meŋ be Kombo sonkoduu karoo la, bari saatee ñiŋ maŋ pompoolu soto. Moo wuli jamaa, mennu be siiriŋ ñiŋ saateee to, ka jiyo soto koloŋolu le to, bari ì ko, wo koloŋolu fanaa be jaa kaŋ ne ñiŋ temboo la. Wo kamma la kibaaroolu ye a yitandi, jii kuwo naata ke siilaalu ye kolyaakuu baa le ti.

Momodu "Justice" Daabo, 17.06.2005

Kiitii baa Ankaliteeri tubaaboo la saayaa to

Kiitii baa, meŋ be kerij Ankalee tubaabu kee doo la saayaa to, kontineeta kunuj Kanifiŋ kiitiibuŋ baa to. Kambiyankoo fula, Dawuda Boojaŋ anij Kawusu Jaaju, ì ye a fo ko, wolu le ye ñij Ankalee tubaaboo faa. Ì ka fo nuŋ tubaaboo ñij ye le ko *Ron Ford*. Ì ko ì ye a faa Kabakeli saatewo kono Kasamaasi bankoo kaŋ.

A be diyaamu la kiitiibuŋ to waatoo meŋ na, Paatee Baa ye a tandi de, ate fanaa be moolu le kono, menny be *Ron Ford* la saayaa kisikisi kaŋ. A naata a fo ko, Dawuda Boojaŋ ye itolu le samba *Ron Ford* la baadee wo to Kabakeli sanji fula koomanto. A ko, kabiriŋ ì futata baadee dulaa ñij to, ì ye *Ron Ford* funtindi, ì naata a baloo dulaa doolu juubee. Kiitiyo ñij be kontinee la le.

Momodu "Justice" Daabo, 17.06.2005

APRC kañeeta Ñaanija, ì foota Njawo

APRC kañeeta Ñaanija, bari ì foota Njawo kariteefayoo to, meŋ keta ñij dulaa fuloo to.

Bundaa baa meŋ marata kariteefayoo kuwolu la bankoo kaŋ (IEC), tumoo meŋ na ì ye kariteekesoolu konti, moolu ye mennu fayi kariteefayoo ñij to, ye a yitandi de, Dawuda Maane le, APRC ye meŋ londi, kañeeta Ñaanija. Ì ko, Maane ye kariteekese wuli kiliŋ keme luulu taŋ anij kononto le soto. A mooño, Abudullayi Jallo, oposisonoolu ye meŋ londi, ì ko ate ye kariteekese wuli kiliŋ keme luulu taŋ anij kononto le soto.

Hani saayiŋ Njawo, ì ko, oposisonoolu le kañeeta jee waatoo meŋ na ì ye meŋ londi Caanne Siisee ye a mooño boyindi. Kariteefayoo keta Ñaanija le tumoo meŋ na, dibitee meŋ be jee, APRC naata a bayi ì la paatiyo kono. Kariteefayoo keta Njawo le tumoo meŋ na ì la kansuloo naata ì foño.

Momodu "Justice" Daabo, 17.06.2005

Luntaŋ baa fula bota *Cyprus* ka naa Kambiya kumpaboo

Luntaŋ baa fula, mennu bota *Cyprus*, ì niŋ Kambiya mansakundaa ñaatonkoolu kacaata puru ka cokiñooolo, meŋ be ñij banku fuloolu teema, ka wo bambandi. Aduŋ ì la siloo fanaa sababoo mu ka Kambiya la tubaabu luntaŋ bundaa juubee fo safaaroo si ke noo ì teema.

Aduŋ ì niŋ minisita fanaa kacaata, meŋ marata Kambiya bankoo la banta la kuwolu la. Ì ye dibitee buŋo la ñaatonkoo fanaa je le anij mansakundaa la moo kummaa jamaa ka kacaa siloolu anij feerewolu, meŋ si a saabu *Cyprus* si Kambiya maakoyi, a la Karaŋo Bundaa anij Tubaabu Luntaŋolu la Bundaa.

Momodu "Justice" Daabo, 17.06.2005

Kambiyankoo faata Amerika

Muhammad Dukure, Kambiyankoo doo, wo le minjiyo dooyaataa Amerika bankoo kaŋ tumoo meŋ na a boyita buŋ jaŋo santo. Muhammad, ì ko, a boyita le waatoo meŋ na a be dookuwo kaŋ ka weeroolu fita buŋ jaŋo santo. Ì ko, a jolonta buŋ jaŋo la buŋ naaninjaŋo le to.

Kibaaroolu, mennu futata ñ na kibaari safeerilaalu la, ye a yitandi de, Muhammed, a maŋ mee baake, a naata a la baadiŋolu juubee Kambiya jaŋ, bari kari saba koolaa doronŋ a naata duŋ ñiŋ maasiiboo kono. A la baadiŋolu ye niikuyaa tandi baake a la saayaa to. Ì ko, Muhammad mu fondinkee katalaa baa le ti, meŋ ye a baadiŋolu nafaa.

Moodu Kante, 15.06.2005

Kambiya ye aada tuluŋo jiyaa

Moofinduu bankoolu mennu be tiliboo maafarŋo la, wolu le benta nuŋ Kanilayi saatewo kono peresidaŋ Yaayaa Jamme la wuluu saatewo to Kambiya bankoo kaŋ ka bo Mee karoo tili muwaŋ niŋ luulu ka taa Juuni karoo tili luulu.

Wo beŋo daliiloo mu ñiŋ ne ti, ka Moofinduu la aada tuluŋolu yitandi aniŋ ka ì yiriwandi. Aduŋ banku jamaa le maabeeta jee, ì ye ì la bankoolu la cosaanoolu aniŋ aada tuluŋolu yitandi. Daliila fulanjaŋo, wo le mu ka cokiŋooloo bambandi Moofinduu bankoolu teema aniŋ ka a yitandi duniyaa la ko, Moofinduu fanaa ye cosaanoolu soto le. *Sierra Leone* bankoo le ye ninaŋ noo saboo kaŋee.

Niŋ Moofinduu aada tuluŋo mu peresidaŋ Jamme la miira kuwo le ti sanji saba koomantoo ka a je ko, saŋ-wo-saŋ Moofinduu bankoolu, mennu be tiliboo maafarŋo la, si beŋ ka ì la cosaanoolu yitandi aduŋ ì be a je la ko, fatanfansoo te tara la moofiŋolu teema.

Moodu Kante, 15.06.2005

Nino Vieira la musoo jikita a keemaa la nooroo la

Nazare V. Vieira, Jinee Bisawu la peresidaŋ kotoo la musoo, a ye niŋ ne fo Kambiya la kibaari safeelaalu ye ko, a jikita le ko, Jinee Bisawu moolu be karitewo fayi la a keemaa ye niŋ peresidaŋ kariteefayi naalaa.

Nazare ye a fo *Daily Observer* ye ko, bankoo moolu ye ì la tombondiroo ke le ka karitewo fayi a keemaa ye fo kayiroo aniŋ ñaatotaa si soto Jinee Bisawu bankoo kaŋ. A ko, niŋ ì ye a je a be jikirinŋ a keemaa la kanewo la, moo jamaa ye suuloo yitandi, ì lafita a keemaa si bankoo mara kotenke.

A ko, a la naa Kambiya bankoo kaŋ, wo le mu ka baadinyaa sabatindi Bisawu niŋ Kambiya teema, aniŋ ka domori feŋolu saŋ moo konkotoolu ye mennu be Bisawu bankoo kaŋ, kaatu a ko, Jinee Bisawu la ñaatotaa mu bankoo moo bee la dookuwo le ti.

Momodou Justice Daabo 25.05.2005

CAF katadamfu ñooseeyaa baa banta - Kambiya ye nooroo ke

Katadamfu berj baa, meŋ kumaasita Kambiya bankoo kaŋ Mee karoo tili woorowuloo, kumfaata Dimaasi luŋo la, Mee karoo tili muwaŋ niŋ saba, *Independence Stadium*, Bakawu saatewo kono.



Kambiya *U-17* katadamfu kafoo kañeeta fayinali baa to, meŋ keta Dimaasi luŋo la. Ì ye *Ghana* bankoo la katadamfu kafoo kañee katadamfu duuriŋ baa to. Kambiya ye katadaañaa kiliŋ soto, *Ghana* maŋ feŋ soto. Kambiya la kapitayinoo, Usumani Jallo le ye Kambiya la katadaañaa kiliŋ dundi waatoo taŋ seyi niŋ wooroo tumoo la.

Bari tumoo meŋ na Kambiya ye katadaañaa kiliŋ dundi, ñoosaboo naata wara Kaanankoolu la katadamfulaalu aniŋ refirii teema, kaatuŋ Kambiyankoolu la wakilindilaa doo funtita poosoo kono, meŋ naata jaakali baa saabu. Doolu ko, ñiŋ kuwo mu sembe fiŋo le ti, kaatuŋ moo jamaa maŋ kee ñiŋ je kabiriŋ a be duŋ na. Fitinoo ñiŋ ye waatoo daa janniŋ Kaanankoolu be soŋ na ka muru naŋ katadamfuu ñiŋ baŋ.

Kañee koolaa la kontaanii baa naata soto Kambiya bankoo kaŋ. Motoolu aniŋ masimmaaluu funtita siloolu kaŋ Kambiya saatee jamaa to, ì be korineelu maa la. Moo wuli jamaalu funtita siloolu kaŋ ke ì la seewoo tandi. Kañee ñiŋ koolaa Kambiya bankoo ñaatonkoo, Yaayaa Jamme, naata Teneŋ luŋo ke foñondiŋo ti, ì ka a fo meŋ ye *Public holiday*. Bankoo ñaatonkoo ye kankulaaroo ke ko, a be feeti baa le ke la Banjulu saatee kono Teneŋ luŋo soomandaa. Wulaaroo fanaa a be pikiniki baa le ke la State House baadaala.

Momodou Justice Daabo 25.05.2005

Kambiyankoolu la kañee ye tiñaaroo saabu

Moo wuli jamaa le ka funti Kambiya bankoo kaŋ ka ì la "U-17" katadamfu kafoo wakilindi, sako Dimaasi luŋo la. Ñiŋ maŋ naa ke kuwo ti, meŋ bee keta kayiroo kono, kaatuŋ moo keme jamaa naata bataakuu jamaa soto jee. Ñiŋ koleyaakuwolu keta bayee kono aniŋ siloolu, mennu ka faa moolu la aniŋ motoolu katadamfu-wo-katadamfu koolaa.

Moo jamaa ka ketu bayee (*Independence Stadium*) kono, baawo jamaa ka siyaa jawuke le. Kibaaroolu mennu futata mandinka.org leeroolu la ye ñiŋ tandi de, moo meŋ yirikoo si taa fo moo keme, ì bee boyita le tumoo meŋ na foño maŋ soto aduŋ kijafaroo ka wara baake le.

A be diyaamu la waatoo meŋ na mandinka.org ye, Yaayaa Siise, sanji taŋ saba niŋ luulu fonduŋee, ye ñiŋ tandi de, moo keme niŋ feŋ bee boyita a ñaa la. "Tumandoo moolu ka boyi kijafaroo le kamma waraŋ bataa, kaatuŋ moo jamaa le taata bayee ñiŋ to kabiriŋ soomandaa," Siise ye ñiŋ tandi. "Ì naata ka ketulaa doolu sawundi moolu kuŋolu santo ke ì jindi duuma puru ka maakoyiroo dii ì la, kaatu kenoo te jee." Kambiya bankoo la radiyo, GRTS, ye ñiŋ kankulaa ko de, moo doolu faata bayee kono ñooseeyaa waatoo la, bari ì maŋ yirikoo ñiŋ fo.

Tiñaaroo doo naata ke siloolu kaŋ tumoo meŋ na fondinkee jamaa be yondiŋ motoolu kaŋ aduŋ moolu la feŋolu fanaa naata tiña tumoo meŋ na kontaanoo be warariŋ baake.

Kibaaroolu meŋ bota Kiti saatewo to, ye ñiŋ tandi de, fondinkee fula minjiyo dooyaata waatoo meŋ na motoo naata ì taki. A ye a tara kontaanoo be warariŋ baake motoo ñiŋ kono.

Justice Daabo 25.5.2005

Senekalinkoolu la ñaatonkoo ye Kambiyankoolu jayi

Senekali bankoo la ñaatonkoo, Abudullayi Wad ye kontondiri leetaroo kii Kambiya bankoo ñaatonkoo la, Yaayaa Jamme, aniŋ Kambiyankoolu muumee Kambiya la kañee fayinali baa to CAF U-17 katadamfu ñooseeyaa to. Senekalinkoolu la ñaatonkoo ye ñiŋ tandi de, a keta kontaanikuu baa leti ate ye aniŋ Senekali muumee Kambiya la kañee CAF U-17 fayinali baa to aniŋ Kambiya fondinkee katadamfu kafoo la kañee ka taa duniyaa bee la fondinkee katadamfu baa to Peru bankoo kaŋ.

Momodou Justice Daabo 25.05.2005

Kanillayi aada beŋ baa kumaasita bii

Kambiya ñaatonkoo, Yaayaa Jamme, bii Mee karoo tili muwaŋ niŋ luula a be aada beŋ daa yele la Kanillayi. Ñiŋ aada beŋ baa meŋ ì ka a fo a ye ko *"Kanilai International Festival"* mu saŋ-wo-saŋ aada beŋ ne ti, meŋ ka moolu bendi ka bo duniyaa fannaa bee la.

Moo keme jamaa i ye wo le fo ko òm be ñiŋ temboo meŋ to ì futata Kanillayi ka bo duniyaa dulaa jamaa la ka maabee beŋo ñiŋ to.

Aduŋ kibaaroolu mennu futata mandinka.org la ye ñiŋ tandi de aada kafoolu mennu bota Kambiya, Mali, Bisawu, Konakire, Senekaali, *Niger, Nigeria* aniŋ banku jamaa òm be ñiŋ temboo meŋ to wolu bee futata le Kanillayi. Kanillayi be Foni le Kambiya bankoo kaŋ. Ate le mu Kambiya bankoo ñaatonkoo la wuluusaatee ti.

Momodou Justice Daabo 20.05.2005

Dimbaa bota Seerekundaa marisewo to

Seerekundaa marisewo Epiŋel karoo tili taŋ saboo luŋo la naata mala baa ke, meŋ ye marisewo la kara jamaa jani. Dimbaa ñiŋ ye tiiñaari baa le ke, kaatuŋ kumfaa jamaa le janita.

Moo jamaa ye wo le fo ko, ate le mu janoo ti, meŋ jawuyaata janoolu bee ti, meŋ nene keta marisewo la taarikoo kono. Dimbaa ñiŋ, ì ye a fo ko de, a kumaasita talaŋ taŋ niŋ fula waatoo Sibitoo aduŋ a be mala kaŋ ne fo montaroo waati naani. Tumoo meŋ na a taata marisee ñiŋ to Sibitoo soomandaa, kumandaŋo meŋ be Kaanifiŋ tundoo la, Abudullayi Konte, ye ñiŋ fo ko de, kisikisiri foloolu ye ñiŋ ne yitandi de, dimbaa malata le kaatuŋ moo doolu ye kuraŋo dundi ì la kumfaalu kono, meŋ niŋ luwaa maŋ taa.

Kumandaŋ Konte waasiita kumfaatiyolu la puru ì si sabari aniŋ ke i muña. Ate fanaa be diyaamu la tumoo meŋ na, Kambiya la minisita meŋ marata safaaroolu la, *Nene Macdoull-Gaye* ye a la balafaa tandi moolu la, mennu la feŋolu janita. A ye a fo ko de, mansakundaa

be katakuwolu bee ke la puru ka moolu maakoyi, mennu la feŋolu janita. Seerekundaa marisee mu marisee baa le ti Kambiya la marisee baalu kono.

Momodou Justice Daabo 20.05.2005

Yankuba Baaji la bataakuwolu Amerika bankoo kaŋ

Kambiyankoo doo, Yankuba Baaji, m̄ be ñiŋ temboo meŋ to, a be katakuu jamaa le ke kaŋ, meŋ si a tinna ì kana murundi Kambiya bankoo kaŋ. Ì ye Baaji kiitindi Amerika bankoo kaŋ ko a lafita ka *social security* niimaroo le soto tapaleeyaa kono.

Yankuba Baaji taata nuŋ Amerika ka a la musoo tankandi aada jawoo la. Bari baawo ì ye a kiitindi le Teneŋ luŋo la *Hamilton County* kiitiibuŋo to ko, tapalee *social security* niimaroo le be a bulu, i si a murundi noo le Kambiya bankoo kaŋ. Ñiŋ be a tinna, ì si a la musoo niŋ a la kari saba dimmusoo forisee noo ka duŋ ñaakaa to, aadoo meŋ ì ye wo le fo ko, ate le ye Baaji la musoo doomaa faa waatoo meŋ na, a ye sanji taŋ niŋ woorowula soto.

“Musoo maŋ haafi ka muru Kambiya bankoo kaŋ, kaatuŋ ì ye a doomaa samba wuloo kono le aduŋ wo le ye a faa, meŋ naata musoo fanaa masilaŋ baake puru naa muruta Kambiya, ì kana a fanaa samba wuloo kono,” *Leslie Holda*, Baaji la looyaa ye a ñiŋ fo kiitiibundaa la kiitiikuntulaa ye, meŋ be *Melba Marsh*.

Baaji, sanji taŋ saba fondinkee, ì ye a muta Okutooba karoo tili muwaŋ niŋ luulu tumoo meŋ na, a ye tapalee *social security* niimaroo dii motowaafidulaa la, meŋ be Ohio, Amerika bankoo kaŋ.

Yankuba Baaji la natoo mu ka dookuu kendoo soto ka a la baadiŋolu maakoyi Kambiya bankoo kaŋ. Bari Baaji, meŋ ka dondikoolu le waafi *Beekman* siloo to, ì naata a muta too koto, meŋ maŋ ke a too ti.

Momodou Justice Daabo 20.05.2005

Alimaamoo Baaba Lii diyaamuta ñaakaatootaa to

Baaba Lii, Alimaamoo meŋ be Kaanifiŋ tiliboo la jaamaŋo to, a ye ñiŋ tandi de, aaya-wo-aaya le te Alikuraanoo kono, meŋ ye ñaakaatootaa tandi. Baaba Lii ye ñiŋ fo ko de, Misilimiyaa mu diina le ti, meŋ daa be yeleriŋ aduŋ a buka moo toora. A ko de, ñaakaatootaa mu feŋ ne ti, meŋ ka maasiiboo le saabu aduŋ a ka dindiŋo la ñaatotaa naasindi le.

“Niŋ ka ke le, kaatuŋ ì ka dindiŋo la solimaa le bondi aduŋ wo ka ke le tumoo meŋ na lopitaani joraŋolu te jee. Aadoo ñiŋ masilaŋo warata baake le aduŋ a si moo faa noo le,” Baaba Lii ye ñiŋ tandi.

Baaba Lii ye dipiteelu jayi ì la murumuruŋo la puru ka bankumoolu kacandi ñaakaatootaa la mantooro la.

Momodu Kasama, 17.5.2005

Kambiyankoolu, mennu be manee ka, si kariteefayoo ke noo

Ko a lonta ñaameŋ, sanji kiliŋo le tuta puru 2006 mansa kariteefayoo ye sii. *Mr. Gabriel J Robert*, IEC la siirantiyo, meŋ na bundaa marata karitee fayoo kuuña la, a ye a la bundaa la pareewo yitandi puru ka Kambiyankoolu mennu be manee la ka ò daa bulandi siniŋ karitee fayoo la ko bankudiŋ kendoo.

A be diyaamu la ñiŋ "*Online*" kibaari kayitoo la, IEC la siirantiyo ye a yitandi ko de, katakuwolu be ke kaŋ ne puru ka karitee fayikuuñaalu futandi Kambiyankoolu, mennu be manee la ñiŋ kariteefayoo meŋ ka naa. Ñ na parendiroo doroŋ maŋ daŋ mansa kariteefayoo 2006, bari a ye dipitee la kariteefayoo muura le, hani ñaa-wo-ña a ò maŋ luŋo soto foloo pur ka mansakundaariŋ kariteefayoo ke. A kontineeta ka a yitandi ko de, parendiri jamaa be kee kaŋ ñinaŋ saŋo la ka kariteefayi kayitoolu dii jaari saŋo la. Ñiŋ ne ye a tinna ò la bundaa wakilita ka Kambiyankoolu, mennu be manee la, ka ò too safee, moolu mennu sanji taŋ niŋ seyi ka taa santo la, aniŋ ka jiibeeroo ke puru ka siloo walaŋ ò ye puru ò si 2006 mansa kariteefayoo ke.

Wo kuu kiliŋo la, *Gabriel J. Robert*, a ye kumoolu bayi, mennu ye a yitandi ko, "kese maŋ bo jaba to" wo 2002 mansa kariteefayoo nuŋ, aniŋ fanaŋ ka a fo ko, kariteefayoo ñiŋ mantaakuu Kambiya maafan doolu to, ko oposisonkoolu ye a fo nuŋ ñaameŋ. A ye niŋ yitandi ko de, kariteefayi koroosilaalu ka bo naŋ banku toomaa doolu le to, ò ye a yitandi ko de, kariteefayoo keta a ñaama le.

Moodu Kante 4.5.2005

Karandiŋo ye kammoo silandi niŋ feeyaraŋ kidoo la

Karambunto dindiŋ doo le ye a la kammoo silandi niŋ feeyaraŋ kidoo la. Ñiŋ kuwo keta Aramisoo Epirel karoo tili 28 Mahad karambuŋo to, meŋ be Birikaama saatewo kono Kambiya jaŋ. Moolu mennu maabeeta jee, wolu ye a fo ko, karambunto dindiŋo la wo maaña keta nuŋ karambuŋo to waatoo meŋ na a niŋ kammoo ñiŋ joteeta ñoo la. A saamoo kabiriŋ dindiŋo ñiŋ naata karambuŋo to, a niŋ feeyaraŋ kidoo naata, a ye a tilindi kammoo la. A ko, "M be i faa la!" Wo naata a saabu fo moolu bee borita ka taa maabodulaa ñini. Bari waatoo meŋ na polisoolu ye kidoo juube, ò ye a tara feeyaraŋ kidoo le mu wo ti.

Momodou Justice Daabo 03.05.2005

Deedaa la bundaa jombaroo

Deedaa Hayidara la bundaa puru ka diyaamoo sooneeyandi, ò ye a jombo Mee karoo tili saba. Jombaroo meŋ keta *Alliance Franco Gambienne*, ye moo keme jamaa le bendi, wolu kono kibaarisafeerilaalu niŋ alifaa buuñaariŋolu.

A be diyaamu la tumoo meŋ na, ñaatonkoo meŋ be Kambiya la kibaarisafeerilaalu la kafoo to, Madi Siise ye ñiŋ tandi de, Deedaa Hayidara la bundaa puru ka diyaamoo sooneeyandi mu bundaa le ti, meŋ maŋ tara mansakundaa koto, aduŋ a maŋ ke diina kafu ti waraŋ politiki kafoo. Siise ye a fo ko de, bundaa ñiŋ ye kalamutaroo ke le ko, banku-wo-banku te taa la ñaato niŋ a tara ko, diyaamoo maŋ sooneeyaa moolu bulu. Bundaa ñiŋ fanaa be bankoo bambandiri ke la le fansuŋ Kibaari bundaalu la fansotoo la puru ka kibaarisafeerilaalu tankandi aniŋ ò la feŋolu.

Momodu Kasama, 30.4.2005

Kambiya fondinkewo ye a faɗo faa

Ì ye Buuba Siise fureemaa tara a be dendiɗ foreesoo kono meɗ be Jaabang saatewo to, Kombo sonkodu bankoo. Ñiɗ keta Araboo Epirel karoo tili taɗ saba 2005.

Kibaaroolu ye a yitandi ñiɗ kibaari kayitoo ye ko, Buuba, meɗ mu Neemawaasulun saatee diɗo ti, a bota suwokono suutoo, a taata a faɗ faa. Ì ye juloo tara a be minindiɗ a kaɗo to. Saatenkadoo meɗ ye furewo je, a naata saatenkoolu kalamutandi. Wo le naata Welinqara poliisoolu kalamutandi, wo tumoo le mu ì naata furewo ñiɗ samba *RVTH* lopitaanoo, meɗ be Banjunu, ka a wisitee ka a faaɗaa loɗ.

Buuba baamaa, miɗ ye a loɗ ko, a fanaa maɗ kontaani baake, a ko de, a diɗ taalaa ñiɗ banta ñaameɗ tuma la meɗ a ye taayi saba. "À si ke noo moo jawoolu la dookuwo le mu", a ye ñiɗ fo poliisoolu ye janniɗ ì be furewo ñiɗ dandaɗ na poliisikundaa.

Koomanto nuɗ, Buuba lafita le ka taa España. A taata niɗ Muuritani siloo la puru ka ñinindiroo ke, bari a la siloo maɗ naa beɗ.

Kibaaroolu ye a yitandi ko, Buuba la saayaa sunta seewoobaliyaa jamaa la baluwo kono fo janniɗ a be a faɗ faa la. Kewo doo ye a yitandi ko de, waati jamaa doolu tambita nuɗ. Buuba pareeta ka a faɗ faa ka a juloo saɗ, bari itolu le ye a bali a la.

Moodu Kante, 27.4.2005

Nino aniɗ Yala lafita loo la Jinee Bisawu kariteefayoo la

Jinee Bisawu la peresiɗaɗ kotoolu, *Nino Viera*, aniɗ *Kumba Yala*, ye hamoo yitandi ko, ì fanaa lafita ka ì daa bula bankoo la kariteefayi naalaa, meɗ be ke la ñinaɗ Juuni karoo tili taɗ niɗ kononto Kinee Bisawu bankoo kaɗ.

Kuwoolu maɗ koyi foloo fo bankoo la luwaa be soɗ na ñiɗ kee fuloolu ye loo, kaatu a fota le ko, *Viera* ì ye a tuumi ko, a ye yaamaroo dii nuɗ soojaroolu la, ka soojari ñaatonka luulu faa waatoo meɗ na a be maraloo la. Aduɗ *Yala* fanaa luwaa ye sanji luulu toɗo le laa a kaɗ. *Nino Viera* nana keta peresiɗaɗo ti Kinee Bisawu bankoo kaɗ sanji taɗ niɗ kononto, wo bota jee, *Kumba Yala* fanaa naata maraloo ke sanji saba.

Moodu Kante, 27.4.2005

Sunkutundiɗolu borita ñaakaato taa la

Sunkutundiɗ luulu le borita naɗ ka bo *Sierra Leone* bankoo kaɗ ka naa Kambiya. Ì la boroo ka naa bankoo kaɗ keta waatoo meɗ na musu doolu lafita wo dindiɗolu diyaakuyaa samba la ñaakaato.

Wolu sunkutundiɗolu ye a fo *Point* la kibaari saferilaa ye ko, niɗ i ye a je itolu borita ka naa Kambiya, ì maɗ lafi ka taa ñaakaato, kaatu wo maɗ ke ì la aadoo ti aduɗ dindiɗolu faamaa ye a fo ko, itolu mu katolikoolu le ti.

Banku doolu, menna be Moofinduu, jamaa ye luwaa londi le ka ñaakaato taa bondi, bari hani wo *Sierra Leone* bankoo ka a kele.

Moodu Kante, 27.4.2005

Kambiya ye kuntiŋ kele kulintiilalu soto

Kambiya mansakundaa ye kuntiŋ kele kulintiilaa fula le saŋ ñiŋ Epirel karoo kono. Niŋ ali hakiloolu be a kaŋ seruŋ saŋo kono, kuntiŋolu fintita nuŋ Moofinduu tiliboo maafango la ka bo naŋ Maroko la maafangolu la ka naa Mali, Senekaali ka naa Kambiya, bari ì maŋ naa tiñaari baa ke Kambiya.

Bankoo la ñaatonkoo, waatoo meŋ na a be kuluntiilaalu dii la nuŋ bundaa la, mennu marata jaatakendeyaa la bankoo kaŋ, peresidaŋo Yaayaa Jamme ye ñiŋ ne yitandi ko, ate mu moo le ti, meŋ maŋ lafi teremma kuu ye a muta siiña fula. A ko, mantaabenta bankoo ye, kaatu kuntiŋolu maŋ futa juuna. Niŋ wo keta, bankoo te jiki noo la banku doolu la, kaatu a si ke noo wolu fanaa buloolu be mutariŋ ne.

Jamme ye a fo ko, ñiŋ kuluntiilaalu ka dookuu doolu ke, meŋ niŋ kuntiŋ keloo maŋ kiliŋyaa, wo le mu suusuulaa pompeeroo aniŋ dimbaa faa. Ì ka wo kuwolu bee ke le. Peresidaŋo ko, banku doolu si a dookundi noo niŋ a ye a tara suuloo be jee. Kibaaroolu mennu bota naŋ *FAO* ye a yitandi ko, a si ke noo kuntiŋolu te siyaa la ñinaŋ sonkodu maafango la, hake la jee la sumuyaa kamma la, aniŋ pompiroolu, mennu keta jiidaloolu to Maroko kataa Alijiiriya tundoo to.

Moodu Kante 9.4.2005

Ninsoo ye kewo faa Kambiya

Ninsi tuuraa ye kee doo le faa Kambiya la santo saatewo to, ì ka a fo dulaa meŋ ye Kuwinela. Wo saatewo mu dulaa le ti, moo jamaa ka beŋ jee luumoo to aduŋ ì ka daafeŋ siifaa jamaa le fanaŋ waafi jee. Bari ñiŋ tuura kamfaa to naata kana ka bori moolu kono, ka ì bayindi fo a futata ñiŋ kewo maŋ a ye a kuura. Bari moolu ye ñiŋ ne fo ko, kewo ñaa maŋ diyaa baake, wo le ye a tinna a maŋ ñinsoo je. Ì naata ñiŋ kee baramariŋ samba Faarafenni lopitaanoo to, bari tili saba ñaato a banta. Niŋ kibaaroo bota "*Observer*".

Moodu Kante 9.4.2005

Dawuda Ba sawunta Finiland katadamfu kafoo to

Kambiya la katadamfulaa baa doo, ì ka a fo meŋ ye Dawuda Ba, wo le ye sanji kilin kotaraakoo siiñee aniŋ Finiland la katadamfu kafoo doo, meŋ too mu *KPV* (waraŋ "*Kokkolan Palloveikot*".) Niŋ kibaaroo yitandita nuŋ Kambiya la kibaari kayitoo to, "*Observer*".

Saŋ Ndoŋ, meŋ mu ñaatonkoo ti "*Hawks Football Club*", Dawuda be nuŋ kafoo meŋ to Kambiya jaŋ, wo ye ñiŋ ne fo ko, Dawuda mu katadambulaa le ti, meŋ ñoŋo maŋ siyaa, kaatuŋ a ka moolu horoma, aduŋ a soobeeyaata a la doo kuwo to baake.

Moodu Kante 8.4.2005

Kono bayi kuuraŋo be moolu faa kaŋ

Konobayi kuuraŋo ì ka a fo meŋ ye ko koleera, wo le ye moo taŋ lulu aniŋ naani faa Senekaali bankoo kaŋ. CNN na kibaari taalaalu ye ñiŋ ne fo aduŋ ì ye a fo ko, moo jamaa be laariŋ lopitaanoo to. Kari dantaŋ koomantoo Senekaali la bundaa meŋ marata jaatakendeyaa la, wolu ye niŋ ne yitandi ko, a kuuraŋo be ì la bankoo kaŋ jee. Aduŋ kuuraŋo naata wajabi lookuŋ dantaŋ koomanto, waatoo meŋ na Tuubaa makaloo be keriiŋ.

Kibaaroolu mennu bota Kambiya bankoo la jaatakendeyaa bundaa to, ye ñiŋ ne yitandi ko, ñiŋ Tubaaboolu kaafo kono bayi kuuraŋ, koleera, wo le ye moo fula faa foloo Kambiya bankoo kaŋ.

Wo kee fuloo menu faata, kiliiŋ bota Kaasamansi Senekaali bankoo kaŋ. Fulanjaŋo bota Ndunku Kebe saatewo to Kambiya jaŋ. Kambiya la minisita meŋ marata jaatakendeyaa bundaa la, Dokita Alhaji Tamsiri Mbuu, ye ñiŋ ne fo kibaari saferilaalu ye ko, feeroo sitita le ka Dokitaroolu bondi naŋ Kuuba bankoo kaŋ, mennu ye lundoo soto ñiŋ kuuraŋ la kuwo la.

Moodu Kante 8.4.2005

Maloolu la maamaŋo Kutawuru

Maloolu mennu be Kuntawuru maafano la Kambiya jaŋ, wolu le maamanta waati dantaŋ koomanto ì la dinkiraa to jee, wo naata moo jamaa silandi jee. Kibaari saferilaa meŋ taata ka, wo dulaa kumpaboori, wo ye ñiŋ ne yitandi ko, a ye mali wooro ñoŋ je, ì niŋ ì diŋolu be wuuri kaŋ kamfaa kono. Wo ye silaŋ baa naati moolu kaŋ, mennu be wo dandaŋo la. Sanji daantaŋ koomanto maloolu ye moo taŋ aniŋ naani la saayaa saabu, wo maafano la.

Momodu "Justice" Daabo, 04.04.05

Suluwolu ye masilaŋo dundi Kiyarŋ Tilijii

Siilaalu mennu be saatee doolu to Kiyarŋ Tilijii naata masilaŋ baa soto nuŋ tumoo meŋ na suluwolu ka moolu ñapikaŋ.

Ñiŋ masilaŋo naataa tinna saateemoolu ka silandiriraŋolu ke ì la koridaalu kono. Kibaaroolu ye a yitandi de, moolu mennu be Jaali, Kenebaa, Kantonkundaa aniŋ Kulikundaa, naata sila nuŋ baake ka funti saatee ye banta suutoo suluwolu la siloo kamma.

"Saateemoolu, mennu be Jaali aniŋ Kenebaa ka suluwolu kumakaŋo moyi le waati-wo-waati suutoo la. Suluwolu ka duŋ saatewolu kono ka ñapi saajiyolu niŋ baalu kaŋ. Ñiŋ na tinna moolu ka silandiriraŋolu ke ì la koridaalu daa to aniŋ kooma puru suluwolu kana duŋ. Siŋ na taamoo ka bo saatee to ka taa saatee loota ñiŋ waatoo", Kenebaa siilaa ye wo yitandi.

Momodu "Justice" Daabo, 04.04.05

Kambiya ye a daa kafu Tubaabu luntaŋolu la beŋo to

Kambiya bankoo, a maŋ mee baake, daa kafuta beŋ baa to meŋ keta *Sweden* puru ka siloolu juubee meŋ be a saabu la Tubaabu luntaŋolu la safaaroo si yiriwaa.

Ñiŋ beŋo loŋ beŋ sabanjaŋo ti meŋ Kambiya ye a daa bula jee aduŋ a be a tinna le Kambiya la nafaalu Tubaabu luntaŋolu la karoo la *Sweden* la marisewo si siyaa.

A be diyaamu kaŋ tumoo meŋ na kabiririŋ a bota beŋo ñiŋ to, Laamini Saaho, meŋ be Kambiya la Tubaabu luntaŋ bundaa baa to, ye ñiŋ fo ko de beŋo ye londitiyolu taamoo la karoo la aniŋ niitiyolu kafundi puru ka kacaa safaaroo la aniŋ ka Kambiya cikandi santa *Sweden* la marisewo to. A naata a fo ko de, beŋo ñiŋ fanaa naata siloo dii Kambiya moolu mennu maabeeta ka *Sweden*inkoolu la taamoo bundaa moolu je ka ì kacandi ñaatotaalu la Kambiya la Tubaabu luntaŋ bundaa to.

Momodu "Justice" Daabo, 04.04.05

Kambiya la Tubaabu Luntaŋolu la Bundaa Baa (GTA) ye kitaaboo bondi

Kambiya la Tubaabu Luntaŋolu la Bundaa Baa (GTA) ye kitaaboo le bondi, meŋ ye a loŋ ko a be Tubaabu luntaŋolu maakoyi la Kambiya jaŋ ñinaŋ saŋo kono.

"All about Gambia" mu kitaabu le ti meŋ be kummaayaa la baake Kambiya la Tubaabu luntaŋolu yiriwandoo to. A be diyaamu la tumoo meŋ na, minisita meŋ marata Tubaabu luntaŋolu la kuwo la aniŋ aadoo, *Susan Waffa-Ogoo*, ye a fo ko de Kambiya mu banku le ti meŋ i ye a loŋ ko, kayiroo, neemoo, tendaa muyilaa (*smiling coast*), aada fooririŋo, alihawaa kendoo, moo betoolu, teeriyaa aniŋ kaawakuu jamaa be jee. A ko de, Kambiya ye feŋ soto le meŋ i ye a loŋ ko moo si a kulloo loŋ ye kontaani dindiŋolu niŋ keebaalu bee.

"Fo i lafita *"eco-tourism"* le la baŋ, aadoo Tubaabu luntaŋyaa, konfirensoolu, futuwolu, domoroo, balaboo ñootoo, tiloo, fankaasoo, Kambiya be beteyaa la i to baake le," minisita ye wo tandi. Minisita naata fo ko de, Kambiya si i juubee noo le waati-wo-waati, kaatuŋ tiloo ka mala le saŋo muumee.

A ye a yitandi de Kambiya mu bankoo le ti, meŋ ka jiibeerilaalu lafinna kuwolu dii ì la. "Ŋà ñ na luntaŋolu kummaayandi baake le aduŋ feŋ ne be luntaŋ-wo-luntaŋ ye jaŋ", minisita ye wo fo.